

修訂日期: 2006/04/12 發行日期: 2007/3/7

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 14, No. 432

原始資料: 蕭鎮國大德提供, 維習安大德提供之高麗藏 CD 經文, 閩學新大德輸入 / Gamblers 大德校對, 北美某大德提供

## No. 432

### 佛說十吉祥經

#### 失譯人名今附秦錄

如是我聞。一時佛在羅閱祇耆闍崛山中。與大比丘眾千二百五十人菩薩五千人俱。爾時世尊與無央數百千人。前後圍遶而為說經。時大會中有一大士名離垢蓋。承佛威神即從座起。偏袒右肩右膝著地。叉手合掌前白佛言。今可現有諸佛世尊如來至真等正覺。若有善男子善女人求佛道者。聞其名號受持讀誦。疾得不退轉於無上正真道。佛告離垢蓋太士。善哉善哉。族姓子。乃能作是問。多所利益。有族姓子。東方去此度一恒沙數諸佛世界。有世界名方莊嚴。其刹有佛名大光耀如來至真等正覺。今現在說法。復有族姓子。東方度二恒沙數諸佛世界。有世界名諦勝諸勝。其刹有佛名慧燈明如來。有世界名金剛。其刹有佛名大雄如來。有世界名淨尊住。其刹有佛名無垢塵如來。有世界名金光明。其刹有佛名上像幢十蓋王如來。有世界名大威神。其刹有佛名威神自在王如來。有世界名香熏。其刹有佛名極受上影王如來。有世界名寶嚴。其刹有佛名內寶如來。有世界名海燈明。其刹有佛名大海如來。有世界名十力燈明。其刹有佛名十力現如來。當知離垢蓋。若善男子善女人求佛道者。恒邊沙刹滿中七寶持用布施如來正覺。若善男子善女人。聞此佛名受持諷誦執在心懷。於大眾中為人廣說。此之功德過前功德。重欲解義而說偈言。

如恒邊沙	諸佛世界	滿中七寶
持用布施	若有得聞	諸佛名號
信樂不忘	功德過前	
若聞諸佛名	諷誦莫忘失	
其人不宜疑	言我不成佛	
六通無窮盡	至于無數劫	
其身當金色	相好以莊嚴	
若持佛名號	過於十億劫	
疾得成正覺		

佛說經竟。離垢蓋大士諸菩薩等。天龍鬼神及世間人。咸皆歡喜頂受佛教。

### 佛說十吉祥經